

– Դա մի առանձին օգուտ չի բերի, – պատասխանեց Ասլանը իր սովորական սառնութեամբ: – Ոչնչացնելով մի հասարակութեան միջից աւազակներին, մենք դրանով աւազակութիւնը ոչնչացրած չենք լինի: Դա ասիական կոշտ միջոց է չարութիւնը բառնալու համար: Մարդկային կեանքի մէջ ոչ մի երեւոյթ՝ առանց Նոյն հասարակութեանը յատուկ պատճառների՝ երեւան չէ գալիս: Վեր առնենք մի աւազակ, մի մարդասպան, մի ստրուկ եւ քննենք նրանց կեանքի պատմութիւնը, կը տեսնենք, որ նրանց կեանքն այնպիսի պայմանների մէջ է դրոած եղել, որ աւազակը պետք է աւազակ լինէր, մարդասպանը՝ մարդասպան եւ ստրուկը՝ ստրուկ: Փոխի՛ր իրանց կեանքի պայմանները, եւ դու կը տեսնես, որ նրանք օրինաւոր մարդիկ կը դառնան: Եւ այսպէս, մենք միայն պիտի ցաւենք, որ մեր մէջ յայտնուում են անպիտան մարդիկ, բայց դատապարտել նրանց չենք կարող, որովհետեւ մեր հասարակութիւնը իր փտած կազմակերպութեամբ ինքն է ծնել այն մարդիկներին: Եւ եթէ մենք ցանկանում ենք, որ չարագործութիւնը բառնանք, պետք է աշխատենք նախ ուղղել հասարակութեան վատ կազմակերպութիւնը, եւ այն ժամանակ նրա անդամները բոլորը լաւ մարդիկ կը լինեն:

– Ես ձեր ասածները չեմ հասկանում, – պատասխանեց Մարօն, – թէ ինչու մարդիկ այսպէս կամ այնպէս են լինում: Ես գիտեմ միայն, որ պետք է օձի գլուխը ջարդել, երբ տեսնում ես, որ նա պատրաստուել է քեզ խայթելու: Ես երդոյել եմ սատկեցնել քեռի Պետրոսին նրա համար, որ նա իմ հօր թշնամին է, եւ այս դիտաւորութիւնը արդէն յայտնել էի Ֆարիատին:

– Քո նպատակը շատ մասնաւոր է, – ասաց Ասլանը, – սրանով շատ չես օգնի «ընդհանուր գործին»: Եթէ այստեղ լինէր մեր ընկեր Կարօն, նա գուցէ կը համաձայնէր քեզ հետ, բայց ես համարում եմ այդ մանուկ սրտի բորբոքում եւ աւելի ոչինչ:

Առժամանակեայ մտածութիւնից յետոյ նա դարձեալ խօսեց.

– Եթէ օձը մի հատ լինէր, որպէս դու ասացիր, պետք էր նրա գլուխը ջարդել, այսպիսով մենք ազատուած կը լինէինք գոնէ մի չարագործից, բայց դժբախտաբար նրանց թիւը շատ է: Ես եղել եմ Ասիական Տաճկաստանում, Կոստանդնուպոլսում, Եգիպտոսում, մի խօսքով ամէն տեղ, ուր կան հայեր: Ես բաւականաչափ ուսումնասիրած եմ մեր ազգի թէ ներկայ եւ թէ անցեալ կեանքը: Ես տեսել եմ, որ սկսած ամենաստոր քուրդ իշխանի դռնից, սկսած նահանգական կուսակալ փաշաների դռնից, մինչեւ վեզիրների դռները, մինչեւ սուլթանի բարձրագոյն դուռը, բոլորը բռնուած են քեռի պետրոսներով: Եւ որքան մեծ անձի մօտ է նրանց ծառայութիւնը, այնքան մեծ է եւ նրանց վնաս-